

Talamdan
sa Mga Mensahe alang sa Full-time Training
sa Fall Term sa 2025

LINANGKOB NGA HISGOTANAN:
ANG MAHINUNG DANONG MGA PUNTO SA KAMATUORAN SA MGA SULAT NI PABLO—
FILIPOS UG COLOSAS

Mensahe 9

Nagpahimulos sa Malangkobon-sa-tanan nga Cristo
nga Atong Pahat nga Giapod-apod diha sa Kahayag

Basahong Kasulatan: Col. 1:12-13; Luc. 11:33-36; Job 42:5-6; Isa. 2:5; 4:4; 5:20; 6:1-8; Sal. 139:23-24

- I. Si Cristo nga nag-una-sa-tanan ug malangkobon-sa-tanan mao ang pahat nga giapod-apod sa mga balaan diha sa kahayag (Col. 1:12); ang pahat nga giapod-apod sa mga balaan sa Bag-ong Tugon dili pisikal nga yuta kondili si Cristo nga malangkobon-sa-tanan nga Espiritung malangkobon-sa-tanan nga nagpuyo sa atong espirtu (Gal. 3:14; 2 Tim. 4:22; Rom. 8:16); ang paggawi uyon ning Espirituha maoy sentro ug mahinungdanong punto sa Bag-ong Tugon (Col. 2:6-7; Fil. 1:19).**
- II. Kinahanglang *maanaa ta sa kahayag* aron makapahimulos ta ni Cristo nga malangkobon-sa-tanan nga maayong yuta sa makatubos ug makapalugwag kinabuhi nga mga aspeto Niya—Col. 1:12-13; Exo. 3:8; 1 Ped. 2:9; Isa. 2:5:**
 - A. Kahayag ang Dios (1 Juan 1:5), kahayag ang pulong sa Dios (Sal. 119:105, 130), kahayag si Cristo (Juan 8:12; 9:5), kahayag ang kinabuhi ni Cristo (1:4), kahayag ang mga magtutuo (Mat. 5:14; Fil. 2:15), ug tangkawang nagsidlak sa kahayag ang iglesia (Bug. 1:20; Sal. 73:16-17).
 - B. Ang kamatuoran mao ang pagsidlak sa kahayag, ug ang kahayag mao ang presensya sa Dios; kon naa nato ang presensya sa Ginoo, duna tay kaalam, sulodnong pagpanabot, panlantaw sa unahan, ug kahibalo sa sulod kalabot sa mga butang; ang presensya sa Ginoo maoy tanan alang nato—Exo. 33:14; 2 Cor. 2:10.
 - C. Tungod sa maluluy-ong mga puangod sa atong Dios, makapahimulos ta ni Cristo nga nisilang nga Adlaw nga niduaw nato gikan sa itaas aron mag-iwag sa mga nanglingkod sa kangitngitan ug sa landong sa kamatayon aron maggiya sa atong mga tiil ngadto sa dalan sa kalinaw—Luc. 1:78-79.
 - D. Si Cristo ang Adlaw sa pagkamatarong nga moayo nato sa paghayag Niya kanato; nagpahimulos ta sa paghayag ni Cristo aron motubo ta sa kinabuhi diha sa pag-abog sa kangitngit, ug aron maayo ta diha sa kinabuhi diha sa pagwala sa pagkadili-matarong—Mal. 4:2; Sal. 84:11.
 - E. Si Cristo ang dakong kahayag aron mosidlak diha sa kangitngit ug mopahigawas sa nagapos—Isa. 9:1-5; Mat. 4:12-16; Juan 1:4-5; 1 Ped. 2:9; Col. 1:12-13; Sal. 119:105; 107:10-22.
 - F. Ang pagsidlak ni Cristo sa sulod mao ang Iyang pagluwas; labi pa gyod tang nagkinahanglan sa pagsidlak sa Ginoo adlaw-adlaw aron labi pa gyod Siyang makaatiman nato—sa Iyang pagluwas, pagpahiuli, pagdasig pag-usab, ug paghimo kanatong Dios—2 Cor. 4:6-7; Mal. 4:2; Prov. 4:18; Sal. 22, ulohan; 80:1, 3, 7, 15-19.
 - G. Ang gidak-on sa kinabuhing madawat nato aron motubo ta sa kinabuhi nitakdo sa gidak-on sa paghayag kanato; ang pagsidlak ra sa kahayag ang makapalugwag kinabuhi, ug ang pagsidlak ra sa kahayag ang makapatubo sa kinabuhi—2 Cor. 4:6; Gen. 1:1-3, 14; Sal. 36:9; Efe. 5:13.
 - H. Tugotan ngani sa Dios nga modangat nato ang tanang matang nga mga pagtintal, kalisod, o mga hampak gikan sa atong palibot, kon gikan sa kinabuhi sa Dios ang naa nato, makalahutay gihapon kini human moagi ning tanang kahimtanga ug labi pa gyod nganing mapadayag; apan, kon gikan

ra sa tawhanong paggawi ang naa nato, mausab ang kinaiya sa paggawi o mawala kini—2 Cor. 1:8-9; 12:7-9.

- I. Naa sa pulong sa Dios ang kahayaag—dili ang sinulat nga pulong sa Biblia kondili ang pulong nga gipamulong sa Espiritu Santo kanato sa sulod, nga nagpadayag pag-usab sa pulong sa Biblia kanato—Sal. 119:105, 130; Juan 6:63; Efe. 5:26-27; A. A. 8:13-14; Isa. 66:2, 5.
- J. Sa dihang mosidlak sa sulod nato ang kahayag, makapabati kini nato sa sulod; busa, maingon nato nga ang kahayag mao ang pagbati nato sa sulod—Juan 8:12, 32, 36; Rom. 8:6; Efe. 4:18-19; 5:8; 2 Cor. 2:13; Mal. 2:15-16.
- K. Nagpalugwa sa daang kabuhatan ang pagsidlak sa Dios sa uniberso; naghimo natong bag-ong binuhat ang pagsidlak Niya karon sa atong kasingkasing; nagpalugwa sa mga ministro sa bag-ong pakigsaad ug sa pagpangalagad nila ang pagsidlak sa Dios—Gen. 1:3, 16; 2 Cor. 4:6; Efe. 5:8-9; Gal. 5:22-23.
- L. Ang paghayag sa Dios sa sulod, ang kahibulongang kahayag sa Dios, nisidlak sa atong kasingkasing aron mosidlak ta nganha sa uban (1 Ped. 2:9; 2 Cor. 4:6); “makakita dayon ka ug mosidlak, / Ug matingala ang imong kasingkasing ug modako sa kalipay” (Isa. 60:5a).
- M. Mogugol gyod tag personal ug pribadong panahon uban sa Ginoo matag buntag aron matuhopan ta sa Dios aron mosanag ta sa Dios ug magsidlak sa Dios—Exo. 34:29-35; Mat. 5:14-16; Fil. 2:14-16a; Efe. 5:8-9.
- N. “Masama unta sa Adlaw kadtong nahigugma Niya / Inigsubang niini sa kakusog niini”—Huk. 5:31.
- O. “Ang agianan sa matarong sama sa banagbanag sa kadlawon, / Nga nag-anam kasanag hangtod sa pagkahingpit sa adlaw”—Prov. 4:18.
- P. Naglakip ang ulohan sa Salmo 22 sa “lagsaw nga baye sa kadlawon” nga malagmit nagpasabot sa huni nga kasagaran niadtong panahona; ang lagsaw nga baye sa kadlawon dinhi nagtimaan ni Cristo sa Iyang pagkabanhaw, nga nahitabo sa sayong kadlawon (Luc. 24:1); gibantog ang lagsaw nga baye sa pag-uloiniktin ug pagluksolukso niini; si Cristo diha sa pagkabanhaw mao ang nag-ulo-iniktin (A. A. 2:8-9).
- Q. “Magmasanagon ang mga matarong sama sa Adlaw sa gingharian sa ilang Amahan”—Mat. 13:43.

III. Nag-agad sa kaluoy sa Dios ang paghayag; matag panahon nga moabot ang Dios ug maghatag sa Iyang kaluoy, ang kahayag sa Iyang panagway maoy atong kahayag, ang Iyang pagtungha maoy atong panan-awon, ug ang Iyang presensya maoy atong kadaogan—Rom. 9:15; Buh. 9:3-4; Isa. 50:10-11; Num. 6:25-26; Isa. 5:20; itandi sa Juan 3:19; Abd. 3; 2 Tes. 2:10-11; Prov. 23:23; Juan 5:44:

- A. Aron mahayagan ta, kinahanglang ganahan ug dawaton nato ang pagsidlak sa Ginoo, ipatumong ang atong kasingkasing nga mabug-os nga ang Ginoo ra gyoy atong tinguhaon—Sal. 139:23-24; Fil. 2:12-16; 2 Cron. 12:14; 16:12; 34:1-3; Sal. 27:8; 73:25; Luc. 11:33-36.
- B. Aron mahayagan ta, buksan gyod nato ang atong kaugalingon sa Ginoo, iliso ang atong kasingkasing Kaniya, ug itugyan ang atong kaugalingon Kaniya sa walay pagpanagana o pagpugong; ang mga dili mobukas sa ilang kaugalingon sa Ginoo mga batid sa pagpanghukom ug pagpanaway sa uban—2 Cor. 3:16; Prov. 20:27; Mat. 7:1-5; Luc. 6:36-37, 41-42.
- C. Aron mahayagan ta, pahunongon gyod nato ang atong kaugalingon; nagpasabot kini nga hunongon nato ang atong mga panlantaw, mga tinan-awan sa mga butang, mga pagbati, mga hunahuna, ug mga opinyon; kon moduol atubangan sa Ginoo ang tawong bug-os na gyong nihunong, mahimo siyang hilabihan kabug-os ug kayano sa pagdawat niya sa pulong sa Ginoo—10:38-42; Juan 11:21-28; Isa. 40:31; Mat. 5:3; Luc. 18:15-17; Isa. 66:1-2.
- D. Aron mahayagan ta, dili gyod ta makiglalis sa kahayag sa Espiritu nga namulong sa atong sulod o sa mga ministro ba sa Espiritu nga namulong sa gawas—Buh. 22:10; A. A. 5:4-6; 2 Cor. 10:3-5; 11:2-3; Num. 16:1-7, 33-39; 17:1-8; itandi sa Exo. 33:11, 14.

- E. Aron mahayagan ta, mapadayonon gyod tang magkinabuhi diha sa kahayag—Isa. 2:5; 1 Juan 1:7; Heb. 9:14; 10:22; Mat. 5:3, 8, 14; Sal. 119:105; Bug. 1:20; Sal. 36:7-9.

IV. Sa dihang gipadayag na gyod sa Dios ang Iyang Kaugalingon kang Job ug gihayagan siya, niingon si Job nga, “Nakadungog ko bahin Nimo tungod sa nadungog sa igdulungog, / Apan karon nakita Ka sa akong mata; / Tungod niini giayran ko ang akong kaugalingon, ug naghinulsol ko / Sa abog ug abo”—Job 42:5-6:

- A. Sa pagpakita sa Dios ni Job, nakita niya ang Dios, nabatonan niya ang Dios sa personal niyang kasinatian ug giayran niya ang iyang kaugalingon—38:1-3; 42:1-6.
- B. Sa kahulogan sa Bag-ong Tugon, ang makakita sa Dios sama ra sa makabaton sa Dios (2 Cor. 3:16, 18; 4:6-7); labi tang makakita sa Dios, makaila sa Dios, ug mahigugma sa Dios, labi natong ayran ang atong kaugalingon ug labi natong dumilian kini (Job 42:5-6; Efe. 5:13; Luc. 5:8; Mat. 16:24; Luc. 9:23; 14:26).
- C. Nag-agad ang gidak-on sa pagkaamgo nato kalabot sa atong kaugalingon sa gidak-on sa pagkakita nato sa Ginoo; tungod niini kinahanglan tang madasig pag-usab matag buntag; ang pagkadasig pag-usab sa buntag maoy panahon nga makakita ta sa Ginoo—Mat. 5:8; Sal. 27:4, 8; 2 Cor. 3:18.
- D. Ang problema kalabot ni Job mao nga kulang siyag Dios; ang kahimtang sa tawo atubangan sa Dios gibasi sa gidak-on sa Dios nga iyang nabatonan—Sal. 27:8; 105:4; Fil. 3:8; Mat. 25:3-4, 9; Prov. 23:23; Bug. 3:18; 2 Cor. 3:18; 4:17; 1 Ped. 2:7; Dan. 5:27; 9:23; 10:11, 19.
- E. Ang tuyo sa Dios sa pagbatok Niya sa Iyang balaang katawhan mao nga mahabwaan sila sa tanan ug modawat ra sa Dios nga ilang kaayohan; buot Niya nga mabatonan Siya, maambitan Siya, mapanag-iyang Siya, ug labi pa gyod Siyang mapahimuslan sa Iyang katawhan, imbis ang tanang ubang butang, hangtod nga modangat sa kinahingpitan gyod ang ilang pagpahimulos aron mahimo silang Bag-ong Jerusalem—Mat. 5:3; Sal. 43:4; 73:25-26; Fil. 3:8-9; Bug. 21:2.
- F. Kini ang tiunayng kahulogan sa tibuok Bag-ong Tugon nga dakong tubag sa dakong pangutana sa basahon ni Job kalabot sa tuyo sa Dios sa paglalang Niya sa tawo ug sa pagbatok Niya sa Iyang piniling katawhan—Job 10:13; Efe. 3:9.

V. Ang panan-awon ni Cristo sa himaya nakita ni Isaias sa dihang nagsubo siya; agig resulta sa pagkakita niya niining panan-awona, natapos si Isaias, wala na, nakaamgo nga tawo siya nga hugaw og mga ngabil, nga nagpuyo taliwala sa mga tawong hugaw og mga ngabil—Isa. 6:1-8; itandi sa Bug. 22:1; 2 Cron. 26:4-5, 16-22:

- A. Bisan sa pagsupil, mga kadaotan, ug mga pagkadunot sa pinili ug hinigugmang katawhan sa Dios, naglingkod pa gihapon si Cristo sa taas ug tinuboy nga trono sa himaya—Isa. 5:20; 6:1-4; Bug. 22:1.
- B. Si Cristo ang bugtong-talagsaong maayong butang sa uniberso; motutok gyod ta Niya nga walay laing gitan-aw pinaagi sa paglingiw nato sa tanang ubang butang; dili gyod ta motutok sa bisan unsang butang o tawo kondili ni Cristo ra—Heb. 12:1-2a.
- C. Gihinloan si Isaias pinaagi sa бага nga gikan sa halaran; ang pag-aplikar sa serafin ning bagaha nagtimaan sa pagkaepektibo sa katubsanan ni Cristo nga nahuman didto sa krus ug giaplikar sa Espiritung nagsiga sa nagsunog ug nagbalaang gahom Niya—Isa. 6:6b-7a; 4:4; itandi sa Luc. 12:49; Bug. 4:5.
- D. Ang lugwa sa pagkakita nato sa Dios mao nga mahinloan ta sa Dios, ug ang lugwa sa paghinlo sa Dios kanato mao nga ipadala ta sa Dios—Isa. 6:6-8; 1 Juan 1:7-9.
- E. Sa nahinloan na si Isaias, gitahasan siya sa Tulo-usang Dios:
 - 1. “Kinsa may Akong ipadala? Kinsa may moadto alang Namu?”— ang mga pulong *Ako* ug *Namu* nagpakita nga ang namulong dinhi mao ang Tulo-usang Dios—Isa. 6:8a; Col. 2:9.

2. “Ug niingon ko, Ania ko; ipadala ko”—gipadala ta sa Tulo-usang Dios aron dad-on ang pinili Niyang katawhan ngadto sa pagkabutang nga magkinabuhi sila ni Cristo aron magpadayag sila Niya sa Iyang himaya, masuroman sa Iyang pagkabalaan, ug magkinabuhi diha sa Iyang pagkamatarong—Isa. 6:8b; Buh 13:47; Isa. 49:6; Fil. 1:21a; itandi sa Gen. 3:24; 1 Cor. 1:30.

VI. Mag-ampo gyod ta sama sa pag-ampo ni David—“Susiha ko, O Dios, ug hibaloí ang akong kasingkasing; / Sulayi ko, ug hibaloí ang mabalak-on kong mga hunahuna; / Ug tan-awa kon naa bay makadaot nga gawi kanako, / Ug tudloi ko sa dalan nga walay kataposan”—Sal. 139:23-24:

- A. Kon moagi ta ning matanga sa pagsusi ug pagsulay sa Dios, makita nato kon naa bay makadaot nga gawi kanato—bisan unsang gawi nga masimbahog mga diosdios o bisan unsang gawi sa kasakit .
- B. Kon wala ang kahayag sa Dios, kinsa may makaila sa iyang kaugalingon? Busa, dili ba panahon karon nga moampo ta sama sa pag-ampo ni David?